

LIBRARY
OF THE
UNIVERSITY OF ILLINOIS

1662a sup
Duplicate
16814 #

IN
**Q. HORATII FLACCI
SATIRAS**

EXERCITATIO POSTERIOR

QUAM D. VI. JUNII H. L. Q. C.

PRO LOCO

IN FAC. PHILOS. OBTINENDO
VENTILABIT

M. IO. IACOBVS MASCOV,

COLL. MIN. PRINC. COLLEGII.

L I P S I Æ,
LITERIS IMMANUELIS TITII
1716.

1716



§. I.



Electare voluit Horatius, sed ut certius prodesset, utque detraheret sapientiae triste illud supercilium, ac stoicam austeritatem, quae multis humanum modum excedere, & speciosa magis quam vera, ac in potestate nostra posita docere videbatur. Haec ejus praecipua laus & olim fuit, & nostro quoque tempore agnoscitur, quo florentes literarum morumque gloria populi, ut docti indoctique legant, suo illum ore loqui docuerunt. Itaque cum jam clarissima ingenia, ne quid in verbis dubii, ne quid in rebus obscuri remaneret, summo studio elaboraverint; fruamur illorum opera, & progrediamur ulterius, & quid ad vitam profuturum afferat, audiamus. Ubi quidem initio statim deprecor, ne quis expectet, ut ex cathedra quasi, multa de virtutum affectuumve humanorum numero, definitionibus ac divisionibus disserat. Liceat mihi, animum ejus ex dispersis hinc inde sententiis collecturo, ut pateat, quo consilio, & quasi preparatione legi debeat, eadem sermonum libertate uti, et familiarius habere philosophiam. Age itaque, Horati, insanire Tibi videntur homines, magno conatu nugas agere, vana rerum specie illudi, nec quicquam ratione timere aut cupere, suis desideriis inconstantes laborare, vitam in apparatu vitae perdere, fluctuare inter virtutum vitiorumque vices, alia votis praeferre, alia facto sequi, nec audere verum sibi dicere. Dic ergo quid facere nos velis ut risum Tibi non debeamus, quis ille

ille vitæ modus , quo nos sæpe vocas , tanquam ad actionum nostrarum & desideriorum mensuram , unde agnoscatur virtus illa tua , quæ in illa illecebræ , qualemque se per omnia vitæ humanæ negocia exserat ? Tum demum recte de erroribus & opinionibus , quibus in contraria agimur , & tota satiræ turæ farragine judicabimus.

§. II.

Non avocat nos a turba Horatius , & in Druydum sylvas , montesque Bramanum veritatis causa ablegat , sed mundum & hominum mores , & se quemlibet ipsum maxime spectare jubet. (a) Quid & quare optent , formidentve : an finem in potestate habeant , consilia ad obtinendum recte temperent , & voto potiti acquiescant ? Quid ab aliis vel opis vel impedimenti proficiscatur , quantum illa in vita possint , & quibus moribus provocentur. Tum pro se quisque attendat , quænam in animo illius voluptatis dolorisve sensum relinquunt , & quam alter ex altero nascatur , quam periculosum sit opinioni , quæ solis sensibus nititur , adversus rationem obedire , & cum tanta sint quibus non indigeat , aliis magis quam sibi de necessitatibus suis credere. Congruum sane est , naturam hominum , negociorumque humanorum discere , antequam limites illi tuos statuamus. Prima sine dubio philosophiæ morâlis ex ejusmodi observationibus origo. Singulas initio & rudes. suggererat experientia , mox uberiores & auctiores , cum constitutis civitatibus , quid publicè privativè hominum mores possint , majoribus jam exemplis constaret. Itaque excitata iis ratio , generales aliquot inde ut prudentiæ , ita & virtutum regulas formavit , & characteres , & nomina rerum , quas gratas ingratasve senserat.

§. III.

Sic facta quædam & vivendi ars , quæ moderari recte impetus nostros , & facultatibus naturæ ad comparandam quam appetimus felicitatem uti doceret. Is quidem propositus omnibus philosophis finis , sed quam diversimode expressus ? Quis crederet Platonem , cum nos Deo similes fieri cupit , & Stoz

ἐν δὲ

(a) *I. S. IV. 105. ad fin.*

ἀνὰ δέσιν, & Epicurum cum voluptatem commendat, idem velle? Et quis omnes sententias enumeraret? quæ tamen magis de objectis, in quorum fruitione summam felicitatem collocare, quam de ipsius felicitatis indole, contendere videntur. Quis non miretur, cum humani generis vota ordinari debent & desideria, in tot opiniones discedi? Sed una est veritas, modi ad eam perveniendi, eamque concipiendi varii. Alii propius attingunt, alii in aditu subsistunt, nonnulli ad utrumque extremum aberrant. Multum præterea scholæ corrumperunt, nimium subtiles in vocabulis, & ubi principum intererat, ut ab aliis dissentire viderentur.

§. IV.

Sane quod omnibus proponitur, ab omnibus debet intelligi, & omnibus persuaderi posse. Qui ita nos instituit, ut bonum in quo acquiescamus semper affectemus, nonne credibile est, eundem & agnoscendi id, obtinendique potentiam nobis dedisse? Quid opus veterem Græciam sollicitare, & Philosophis Poëtarum manum subijcere

- - - *stirpare Platona Menandro*

Eupolin Archilocho - - -

ubi ad se tantum revocandus est animus? Est enim in nobis, ut verum a falso, ita & bonum a malo discernendi potentia. Sæpe errori patrocinantur sensus, iidem tamen, si distincte, & data opera aliquid repræsentant, certissimi veritatis testes sunt. Eodem modo internus ille sensus, qui amorem et odium ac prolixam utriusque propaginem gignit, licet transversos multos agat; si ratione regatur, officia nosmet nostra omnium optime docebit. Scilicet omnes instinctus nostri, & facultates omnes serviunt illi voluptati, quam ex conservatione nostri percipimus. Primum in hac vita bonum est esse, sed bene ac placide esse. Criterium itaque eligendorum fugiendorumque erit, quicquid rebus ad suavem illum & beatum & constantem acquiescentis animi statum adminiculi vel impedimenti inest. Hoc est illud veteribus quæsitum *πρῶτον δεικνόν*,

primum familiare, primum apertum, adscitum, accommodatumque naturæ, in quo illa invitamenta sua, & primum quasi omnium actionum nostrarum mobile reposuit, et a quo perinde, tanquam primo fonte, omnis de bono & malo disputatio deduci debet.

§. V.

Sequamur ergo naturam ducem, & quid facere nos velit ex instinctibus & facultatibus nostris, ac indole rerum humanarum deducamus. Ubi statim deprehendimus, alia plus, alia minus ad finem illum facere. Quædam prorsus necessaria nobis sunt: alia commoda quidem & jucunda, sed carere tamen iis utcunque possumus. (a) Quædam ad vitam & valetudinem ac integritatem corporis, alia ad conscientiam, & animi culturam pertinent. Omnia se præmiis suis commendant, nec sine malo aliquo omittuntur. Prout majora ergo, minorave, fortius etiam aut remissius nos inclinant.

§. VI.

Primo quidem cuilibet apparet, ita nos esse comparatos, ut alter alterius auxilio cum propter vitam, tum propter ipsius rationis culturam carere nequeat: Adeo ut si vel maxime liberalem illum, ac vere humanum affectum, quo sponte & gratis sibi mutuo conciliantur melioris indolis mortales, aut prorsus non senserit aliquis, aut barbara educatio oppresserit: necessitas tamen, ut aliorum rationem habeat, urgebit. Si invitos invicem subigere, si insultare, si res proprias vi auferre institueremus, cum unicuique idem sui amor, idem resistendi animus, ac eadem fere vires sint; quæ foret illa vita inter cædes, rapinas, insidias, metu, ira, invidia, dolore agitata? Ideo limites cupidinibus ponere, & libertatem, rerumque proprietatem, & matrimoniorum sanctimoniam, pactis primum, & publica fide, post & legibus firmare opus fuit.

Jura inventa metu injusti fateri necesse est.

Dum itaque singuli securitatis propriæ causa desiderium aliquot premere malunt, quam alterum temere incitando, majoris molestiæ discrimen subire, publica sensim securitas, qua reliqua vitæ civilis

civilis commoda nituntur introducta est. Et hic sensus est, eam nostro

Utilitas iusti prope mater & aqua appellatur. (a)

§. VII.

Invidiose objici solet, quod mox addit:

Nec natura potest, iusto discernere iniquum,
quasi assereret naturam quidlibet faciendi potestatem nobis reliquisse, nec aliquid extra leges vitii fore. Quæ cum aliæ apud alios populos sint, ac subinde mutantur, nihil certi in doctrina morali remaneret. Sed locum inspicientibus patet, prorsus aliud agere Horatium. Disputat adversus Stoicam delictorum æqualitatem, & aliud alio atrocius esse, prout gravius leviusve utilitatem publicam violet, cujus causa & leges illæ, & actiones, & remedia coactiva constituta sint. Extra civitatem ubi quis læditur, ultionem una cum familia & amicis parat, & modum inimicitie non capiunt, adeoque abstinere ab injuria suadet ratio, tanquam a re noxia. In civitate autem magistratus est definire jura singulorum, & quæ quis jure perfecto, & actione in foro ab aliis exigere possit: quibusque modis inviti etiam compelli, & in ordinem redigi debeant. Sic demum notio iusti, injustique oritur, quam etiam si dicas a sola lege civili pendere, nihil tamen virtuti & officiis nostris decedet. Natura enim easdem actiones sub boni malive specie suscipiendas aut omittendas repræsentat. Ibi actio ut iusta commendatur, hic ut utilis & necessaria. Imo iusta facta est, quia tam præsentis ad salutem publicam usus erat. Idem utrinque cuneus urget, & male agere neque per legem, neque per naturam impune est. Pœnz formidine continentur improbi, sed ut leges iustum injustumque arbitrarii mali comminatione sanciverunt, ita natura humana sic est disposita, sic ad se invicem comparati affectus nostri, & facultates, ut perversi mores se ipsos fere ulciscantur.

§. VIII.

Officio iusti quis satisfecerit, externæ quidem securitati suæ consulit: sed viri boni laudem non meretur, nisi animum
a prava

a prava cupidine integrum servet, et nulla necessitate extrinseca compulsus, sponte rectum se præbeat. (a) *Quam angusta innocentia est ad legem bonum esse, quanto latius officiorum patet, quam juris regula? quam multa pietas, humanitas, liberalitas, justitia, fides exigunt, quæ omnia extra publicas tabulas sunt.* (b) Honesti hæc est uotio, si specialius sumatur vocabulum, ut denotet id, quod ratio faciendum nobis repræsentat, tanquam respondens fini humanæ naturæ, qui est omnium & singulorum felicitas, licet nulla in vita civili lege, nulloque periculo sancitum sit. Alias latius patet, & tam officia iusti, quæ summa ipsorum necessitas legibus inseruit, quin nobiliora illa præcepta, quorum fructus in conscientia sunt, complectitur. Ita Stoici honestum dicebant *perfectum bonum, quod omnes a natura habeat quæsitos numeros, sitque perfecte moderatum*, & hoc sensu quatuor ejus species, *justitiam, fortitudinem, temperantiam & scientiam* constituebant. (c) In quo fere cum Platone illis convenit, ex cujus sententia Cicero ad honestum refert, perspicientiam veri, solertiamque tuendæ societatis curam, animi excelsi atque invicti robur, modestiam atque temperantiam. Atque ad duas illas significationes reduci fere possunt, quotquot passim diversæ honesti definitiones afferuntur.

§. IX.

Æque late cum honesto patet virtus, quando ut solet fere, de moribus usurpatur. Est illa constans & perpetua voluntas agendi, quod honestum est: cumque per omnem vitæ ambitum se diffundat, variis postea nominibus ad singula objecta determinatur. Horatii illud:

Virtus est vitium fugere.

Lactantio displicuit. (†) Quasi vero Poëta Chrysippi scrinia expilare, & minutias, quales vix Stertini acumen capit, sectari debuisset. Repetit ibi incidenter, quæ passim inculcat, virtutem esse in illo æquilibrio, quo natura humana amorem proprium,

(a) *I. Ep. XVI. 40. seq.*

(b) *Senec. de Ira l. c. 27.*

(c) *Diog. Laërt. in Zenone 100.*

(†) *Instit. div. VI. p. 516. ed. Oxon. 1684. 8.*

prium, & curam societatis, appetitum & reflexionem, æquis ponderibus sustinet. Itaque si ad alterutrum extremum inclinatus fuerit animus in vitium incidit.

*Insani sapiens nomen feret, æquus iniqui
Ultra quam satis est virtutem si petat ipsam.*

§ X.

Quidnam vero est illud *quod satis est*? Equidem vereor, ut ullos agnoscant limites, qui virtutem per se, detractis omnibus præmiis, fructibusque expetendam censent. Quisnata apud illos modum excedere existimabitur in appetenda re, cujus fines a nulla alia definiuntur? Splendida causa est, & quasi sacrosancta, quia si quis dubitet, aut de sensu saltem verborum querat, statim ac si quod maxime sanctum inter homines est, in commercium trahat, ac venale exponat, ignominiose repellitur. Itane, ajunt, amicitias utilitate metiris? Sapientia Tibi, iustitia, fortitudo, temperantia vana nomina sunt, quæ tum demum sequare, cum reditus prius computaveris? Leonidas tibi, & Epaminondas, & apud Romanos Decii, & M. Regulus, & Lucretia, & L. Virginius, & tot alii, qui pro patria, pro pudicitia, pro fide vitam, aut proxima vitæ pignora posuerunt, aliud quicquam, præter solum honestum in consilio habuisse videntur? Egit hanc causam Cicero, (a), cum adversus Torquatum disputat, qui ex Epicureorum sententia, omnem virtutis fructum ad voluptatem retulerat. Et quis ageret facundius? quid non, quod in se exile est, magnum & speciosum in illo ore evadit? Res ipsa itaque in culpa est, quod ille, qui toties de senatu, toties de populo eloquentia triumphavit, hic lectorem destituat, nequaquam convictum captionibus istis dialecticis, & perpetua vocabuli voluptatis cavillatione. Audeam dicere, obesse illum virtuti, dum maxime inservire vult, & quadrare huc quæ Aristoni, & Pyrrhoni ipse objicit: *Dum in una virtute sic omnia esse voluerunt, ut earum selectione expoliarent, nec ei quidquam aut unde ori-*

R

retur,

(a) Lib. II. de fin. bon. & mal.

retur, darent, aut ubi niteretur, virtutem ipsam quam amplectebantur, sustulerunt. Non vult admitti precario virtus, nec adeo ingrata est, ut nihil suis rependat. Idque adeo verum est, ut ipse Cicero, dum maxime contrarium agit, modo honestum commendat ideo; quod natura hominum sociali convenit, quod verum, quod utile, quod pulcrum est: modo gloriam, quæ illud sequitur, repræsentat. Nonne hoc est honesto aliquod prius supponere? Et gloria quidem illa, magna virtutum mater apud veteres, cujus litis & Te, Cicero, Arpino Romam traxit, & pulcherrimum Patris Patriæ nomen tibi obtinuit, quem habet efficaciorum stimulum, quam virilem voluptatem, quam generosæ animæ ex recte factorum conscientia, & aliorum iudicio sentiunt. Cur ergo non agnoscis Epicuri vocem, negantis jucunde vivi posse, nisi etiam honeste? Cur obstinate adeo exprobras quod honestum omne sustulerit, illi qui idem etiam jucundum esse probavit, & cujus mortem ipsæ Leonidæ & Epaminondæ æquas?

§. XI.

Sed jam quod Lollio suo examinandum commendat Horatius (a)

Virtutem doctrina paret, naturam donet?

ipsi ex sententia ejus conficiamus. Beate, hoc est jucunde, tranquille, saltem minimo cum incommodo, quantum indoles naturæ & conditionis nostræ patitur, vitam agere cupimus. Id alii in aliis rebus, & sæpe frustra querimus. Plerique etiam non tam suo quam aliorum ingenio vivunt. Sed qui id ex rationibus magis quam cupidinibus discere voluerit, deprehendet ita arcana quadam dispositione institutam esse naturam humanam, ut nihil ad promovendam felicitatem efficacius sit, sapientia, fortitudine, temperantia, humanitate, & quicquid ad virtutem pertinet. Non ad simulatam illam, & ad captandam viri boni famam unice compositam, sed illam quæ penitus in animum descendit. Quod postea per singulas obsectorum, quibus

(a) I. Ep. XVIII. 100.

quibus præcipue afficimur classes deducendum, nunc ex generalibus quibusdam probabitur.

§. XII.

Honorificum virtuti testimonium est, quod & pessimus quisque illi perhibet, dum vitia sua, quantum potest ad similitudinem ejus adducit, ejusque nomine appellari optat. (a) Quis non avarus parsimoniam, quis non versutus & perfidus, constantiam, fidemque laudaverit? quis se unquam ingratum, quis superbum, quis invidum confessus est? Intelligunt nimirum quantum momentum ad concilianda hominum studia habeat viri probi & integri fama, & quod quilibet sapiens & æquus hominum judex, ut Mæcenæ solebat

turpi discernit honestum

Non patre præclaro, sed vita & pectore puro.

§. XIII.

Sed illa forte gratis dicta: quoniam ita sufficere arbitrabuntur cupidi, & honorum studiosi homines, si speciem viri boni referant. Quid non imitatur amor proprius, cui non servit scènz, ut voto potiat? ad omnem indolem, omne vitæ genus se attemperat,

in cælum jufferis, ibit.

Quærenda ergo sunt, quæ ut bona fide, & remoto etiam custode virtuti operetur, persuadeant. Et in tanta quidem ingeniorum varietate, ubi aliis alii judiciis reguntur, non suffecerit unam tantum & singularem rationem attulisse. Erectiores animos amor veri & pulcri ducit, & nobilis verecundia nihil contra admisisse. Si id in unaquaque re pulcrum est, quo ante alias ad præstandum usum suum excellit, idque utilitate hac, & quadam ad reliquas partes proportionem nititur, quid possit homini pulcrius virtute obtingere? Sic & Græcis honestum & pulcrum eodem nomine appellatur.

§. XIV.

Expendant mihi velim, quam multo cum ipsis melius agatur, si quales videri volunt, revera se præstent. Multi qui peccant, semetipsos id celare mallent, quod aliqua illis de honestate persuasio superest, quam contrariam quidem desideriiis suis experiuntur, excutere autem veluti falsam non audent. Et licet ad speciem aliquam excogitandam satis ingeniosi sunt, major tamen est vis veritatis. Quam licet aliquantisper obruat impetus, resurgit tamen illo deservescente, seque ulciscitur. Rident autem ad talia, qui sensum virtutis, quem nunquam habuerunt, non metuunt. Deberent quidem multa illos exempla commonescere, neminem securum esse, quid in posterum sentire possit. Multis ætas, morbusve, aut casus improvisus, auditave forte aut conspecta virtus meliorem mentem dedit, & ante acta tanto acrius dolentem, quoniam frustra. Sed magis movere debet cogitatio, quod hominum voluntates viresque ita sunt dispositæ, ut nemo facile impune malus sit. Odimus & declinamus quos injustos, perfidos, ingratos, impotentes animi novimus. Corruptit tacitorum scelerum fructum metus, ne olim improvisa illa dies prodit. Et demus illis latebras, inest tamen iis aculeus suus, inest quod efficit ut carere iis aliquando mallent. Audimus homines de iracundia, de impatientia, de suspicionibus suis queri. Sæpe accusant gratissimos appetitus suos, cum adversus medici interdictum feruntur. Nihil proficitur iudicio, nec quo jus fasque, quove amici aut futurorum providentia, sed quo affectus trahit, itur.

§. XV.

Adeo autem ille inquietus & insatiabilis est, ut nisi mature modum sponte quis imponat, diu delusum & fatigatum fera tandem necessitas, invitum, & nequicquam oblectantem in ordinem cogat. Habet enim omnis cupido multa
extra

extra arbitrium nostrum posita. Qui gloriam ex aliorum de se existimatione captat, ubi per multos annos uni huic operi, omnes vitæ blanditias, omne aliud officium postposuit, num tandem polliceri sibi omnia suffragia poterit, in hac judiciorum licentia, & a seculo tam suspicaci, tam fastidioso dictorum factorumque alienorum interprete, quodque acumine suo, scientiarumque & artium, & omnis moralis & civilis doctrinæ luce, ad aliorum censuram præcipue uti videtur? Quam dura servitus: *ille me parum humane salutavit, ille osculo meo non adhaesit, ille inchoatum sermonem cito abruptit, ille ad cenam non votavit, illius vultus averter visus est.* Quam multorum spem posteritas destituit? Et si id parum videtur, quoniam non sentiunt ipsi, augere tamen sollicitudinem viventium potest, qui eo solatio ægritudinem suam solantur, cum non justum sibi pretium poni queruntur.

§. XVI.

Interest porro quo modo quæ honesta sunt peragantur. Perdit sæpe beneficii gratiam vultus & sermo quo datur. Sapientiam ipsam vilem & ridiculam nonnunquam fecit affectata austeritas, penula & baculus, detritum pallium & supercilio brevior coma. Multa ex moribus receptis ad personarum, temporis, loci, intentionis nostræ circumstantias attemperare debet prudentia. Eo comparatæ sunt virtutes homileticæ Aristotelicorum. Recentiores fere decorum vocant, angustiori vocis significatione, quam veteres interdum adhibebant, præsertim Stoici, quibus decorum & honestum promiscue usurpatur. Totum illud tollebant Cynici, servilis secta, qui præter rigidam virtutem nihil dignum putabant, cujus causa vel minimum facerent. Solent argumentis illorum adhuc hodie uti, qui omnia illa tanquam inepta, & a vanis hominibus ad fraudem atque ostentationem excogitata rejiciunt. Disputat adversus Cynicos Poëta. (a)

B 3

Et

(a) I. Ep. XVII, 16. seq.

Et sane, cum plurimum ad conciliandas hominum voluntates faciat morum similitudo, ea vero raro inter plures contingat, quis foret vitæ civilis tenor, si prudentiores naturam arte non supplerent? Nunquam evellent Cynici hominum animis mutuum illud placendi ac benefaciendi studium, ad quod summa nos ex amore & amicitia orta lætitiâ invitât. Rusticus erat factus, in nullius gratiam vim propriis moribus facere, neminem in modestius alloqui, & in rebus permissis, sermone, cultu, victu, non sequi multitudinem velle, sed ducere. Ast vero libertatem jactabant. Quasi non æque propter lactucam, vilemque panem obnoxii plebejis hominibus fuissent, ac Aristippus ob regiam mensam Dionysio. Illud adhuc pro Aristippo adversus Cynicos urget Poëta, quod ad omnem vitæ modum factus, quamcunque fortunam ferre potuisset, quodque penula illum nudusque humerus æque ac Syracusana toga decuisset, quales contra præstitissent se Antisthenes & Diogenes & Crates in aula, cui nec divinus Plato accommodare se poterat?

§. XVII.

Ut quæ contra honestatem fiunt, odium & indignationem excitant, ita quæ hic peccantur, modo malitia abfuerit, risu fere transmitti solent. Nolo omnes ridiculos in scenam revocare, quos Horatius produxit. Sed male tamen obliviscitur sui prætor ille Fundanus, qui in municipio

Prætextam & latum clavum, prunaque batillum (a) magnorum Romæ magistratuum insignia imitatur. Jura Damasippus ineptum Mæcenatis imitatore[m] ridet, in dissimili fortuna impensas ejus moresque æmulantem. (b) Quam abjecta, quam indigna agunt patiunturque hæredipetæ? (c) quam obtusus est importunus ille Horatii comes, quam se inepte laudet, quam intempestive profert studium consiliumque innotescendi Mæcenati? (d) Quam insulsæ Nasidieni epulæ, quæ

fordium

(a) *Serm. I. 5. 31. 36.*

(b) *II. S. III. 307.*

(c) *II. S. V.*

(d) *I. Sat. IX.*

fordium & elegantiae mixtura? (a) Commendat dapes suas, usque adeo ut in apro quod putet, in murena quod gravida capta est praedicet. Laudat magno convivae & callidissimo deliciarum vina quae non apponit, & sic quoque ad liberaliorem haustum expallet. Non facile alibi fecundior ridiculi seges est quam ubi idem vitae modus non tenetur, aut species quaedam, minutis alienisve actionibus captatur: quando quis fluctuat, & indies consilia ac vota mutat, quando qui modo rigidam virtutem profitebatur, mox ad levissimam vitii tentationem succumbit, quique nunc nobilissimis æquari cupiunt, paulo post infra serviles sortes deiciuntur. (b)

§. XVIII.

Sed manca est philosophia, quae generalibus contenta, non applicat illa ad vitam & objecta, quibus tota fere occupatur. Vitam ipsam, inquam, valetudinem, vigorem, formam, oblectationem sensuum, existimationem, famam, gloriam, possessiones, divitias. Quorum omnium fines ita regendi sunt, ut quantum quidlibet illorum, ad necessitates nostras sublevandas, augendamve felicitatem facit, tantum in sectando, conservandove studii ponere fas habeatur. Faciam rei periculum in praecipuis illorum: Ubi non tam miror, quod multi modum hic non teneant, quam quod inter illos, qui rationis imperium sequi se profitebantur fuerint, iique sapientiae laude celeberrimi viri, qui nihil prorsus illorum in parte boni ponendum esse contenderint. Si vel maxime anima in corpore tanquam in carcere ageret, nonne sapiens carcerem etiam, quantum potest sibi accommodabit? Debebat sane arctissima corporis & animae conjunctio admonere illos, utriusque curam nobis convenire, atque ut perfecte bonus est, qui omnes utriusque facultates rite temperat, ita ad perfectam felicitatem requiri, ut toti homini bene sit. Sed fallor, aut in meram de verbis disceptationem tota haec controversia exibat.

§. XIX.

(a) II. *Sat.* VIII.

(b) II. *Serm.* VII.

§. XIX.

Mallet sane & Stoicus, ex suo fundo, quæ ad tolerandam vitam necessaria sunt, tollere, quam aliena quadra vivere, & sub insulto domino multa aut facere, aut pati indigna. Non potest enim erigere sese, aut egregium aliquid moliri animus

- - - *de lodiæ paranda*

Attonitur.

Qui contra, si ab illis sordibus liber, sua tantum agere negotia potest, in lasano etiam & aqua cum corpore convivabitur, lardumque suum & olus omnibus parasiticis mensis longe anteponet. (a) Modica res suffecerit, qui bene illa uti novit. Eadem enim ratio, quæ suadet, ut quisque pro se vitæ suæ subsidia habeat, paucis quoque contentum esse docet, ut fortunæ quam minimum in eum liceat. Non invidet ditioribus, (b) non orbo Dapæ adulabitur. Inanis enim illa tristitia, hæc dura servitus. Conservabit sua, & concessis modis ampliabit; non ut illi suadere solent, qui unam pecuniam, virtutem, genus, formam, ingenium, gratiam, suadamque dare putant. (c) Seponet suis quæ frugalitas comparferit, (d) eosque non sanguinis tantum, sed & publici boni ratione computat. Nec ad ultimas tabulas differet beneficentiam, sed accommodabit tempori, quo maximo cum fructu prodesse potest: (e) & sic secundis aliorum rebus gratoque animo superflus fruetur, ac posteritati suæ quasi intererit.

§. XX.

Avaritia vero, (f) præterquam quod nimis facile mentem a vero rectoque abducit, hoc in se habet ridiculum, quod videmus homines res ad usum vitæ factas, in contrarium profus vertere. Quærent argentum anxii, non in solatium senectutis, non quo liberalius educantur liberi, patria, amici adju-

(a) *conf. I. S. VI. 60. seq.* (b) *ib. 10. seq.* (c) *I. Ep. I. 65. 66.*
 (d) *II. S. VI. 7.* (e) *II. S. II. 103. 105.* (f) *argum. I. S. I.*

adjuventur; sed quod vel defodiant timidi, vel majoris lucrispe iterum perdant. Ad minimum, quam illos excruciat futurum, tempestatum, incendiolorum metus, quam sola fraudis aut periculi suspicio? Tandem vix propriis jam manibus fidunt. Denique id operæ & tot ærumnarum pretium habet avarus, ut liberi, uxor, cognati, & quicumque amicissimus natura esse debebat, illum oderint, atque ubi forte de frigore, aut calore queritur, stomachusve aut somnus in suspensionem venit, securi jam in funeris spem nummos fœnore conducant, & cum aliquando vera hæc gaudia fiunt, ne quidem honoris causa mortuo illachrymentur. Nec habent sæpe, quod acceptum illi ferant, nisi quod mortuus est, ut Horatianus ille, qui sapienti parsimonia mori, quam sumtus in medicinam facere malebat. (a)

§. XXI.

Et quis avaritiæ unquam defensionem suscepit? Impeditior de voluptate quaestio est, quæ ex sensibus oritur. Hinc enim severior virtus, & multo acrius affectatio ejus, hinc interna inclinatio certant. Sed plerumque ne de vocabulis quidem convenitur. Notus est Hercules in bivio, nota Pythagoricorum abstinentia, & famelica Cynicorum ac Stoicorum diæta. Contra etiam Socratem, cujus præcipua fuit cura, doctrinam moralem conciliare cum desideriis hominum, in conviviis invenimus, lotum, novisque indutum calceis, hilarem & liberius differentem. Usque adeo captat delicias optimus senex, ut eum ultima die, demto sibi compede, vestigia ferri in crure leviter fricat, gratias fere agat antecedenti dolori, quod hanc sibi voluptatem pepererit. Nihil de Epicuro aut Aristippo addam, quoniam illorum qui nomina audit, statim sibi patronos voluptatum repræsentat. Carneadis autem, Calliphonis, Diodori, Hieronymi, (b) qui omnes voluptatibus faverunt, obscurior est auctoritas, quam ut mereantur adduci. Atqui & veterum Academicorum, & Peripateticorum ea fuit sententia,

C

ut

(a) *II. S. III. 157.*(b) *vid. Cic. Fin. II. II. ed. Gron.*

ut finem bonorū dicerent, secundum naturam vivere, id est virtute adhibita frui prius a natura datis. (a)

§. XXII.

Non est hujus loci disquirere, quousque singulos illorum hypotheses suæ deduxerint, quæ logomachiz intercesserint, quibusve ex causis alias hypotheses favor, alias invidia exceperit. Præstabit rationibus rem agere, cum quisque pro se deprehendat, ita mentem & corpus nescio quo vinculo uniri, ut multum illius intersit, quomodo hoc nutriatur, exerceaturque. Ita vero instituta est corporis structura, ut novis indies alimentis instaurari debeat, ut exercitatione & quiete opus habeat, utque illæ res non solum innocentem, & maxime naturalem voluptatem pariant; sed objectorum etiam, quibus circumfundimur, alia aliis convenient. De gustibus nemo disputat. Oculus usu hebescit, & iterum quibusdam coloribus delectatur. Modo apricas hortorum pratorumve amœnitates, modo obscuram sylvarum virentem desiderat. Ipsa justa rerum figura, similitudo, dispositio, proportio placet. Quam non vultus, habitusve corporis, & cultus hominem sæpe commendat? Et in his quidem ratiocinationis forte aliquid inest. Sed odoribus quoque aliis suaviter, aliis secus afficimur: aurem quidam soni offendunt, quidam demulcent, & corporis membra æque ac animum incitant. Itaque discrimen aliquod jucundi & molesti, quantum ad sensus, iterum a natura est, quæ non animum modo tranquillum sed corpus etiam sine dolore vult, & voluptatem, quæ in motu est, in lucro ponit, sive in animo cognitio veri, recteque factorum conscientia lætitiā, spemve excitaverit, sive a corpore profecta fuerit hilaritas.

§. XXIII.

Sed cum instinctus illi in infinitum tendant, nullo habito moralium circumstantiarum discrimine, reflexione opus est in
feli-

(a) Cic. Fin. II. v. ed. Gron.

feligendis objectis, ne voluptates sectemur, quæ longa poenitentia luendæ sint. (a) Quod accidere solet, cum in rebus inhonestis quærantur, quæ valetudinem, existimationem aut rem familiarem affligunt. Illa enim molestia non tam ex sensu voluptatis provenit, quam quod actione incongrua quæsitæ est. Itaque examine, & providentia futurorum, & commensuratione opus est circumstantiarum, ut constantes & innocuas voluptates, aut quæ saltem quam minimis incommodis urgentur, a brevibus & noxiis discernas. Quin & rigidior illa pars, non tam eripiunt sensibus voluptatem, quam parabili contentos esse docent. Cynici ipsa fame obsonia condiebant, M. Antonino in pellibus suis, quis non credat facilem jucundumque somnum venisse, cum Mæcenæ frustra illum multa arte & impensa invitaverit. Etiam avium concentus, aut leniter labentis aquæ suffusus aurem delectat, & prata certantem hortis odorem spargunt.

§. XXIV.

Non pudebit nos, speciminis loco, quem voluptatibus his ipsa hominum natura modum ponat, ab Ofello rustico audire, pro vita temperante, sobria, frugali verba faciente. (b) Objicit primum luxuriæ, quod vita illa animum enervet, segneque & officii negligentem efficiat, ac ad vitia inclinet. Assuescere animum fallendo ignavis artibus temporis, ut tandem nec horam secum esse possit, & sic cum corpore simul ante tempus contabescere. Nam valetudo simplici fere & ordinato victu, abstinentia, labore & modica quiete diutissime servatur. Sed metuenda est illis senectus, qui ætatem rebus gerendis aptam, in qua vitæ præsidia conquirere debebant, adeo molliter habuerunt, ut deinde vel probrosam vitam nudi inertesque trahere, vel præcipitia consilia sequi debeant. Scilicet actum est de re familiari, ubi mores isti dominantur. Qui vero ab illa parte securos se putant, honestius tamen impensas facere possent.

C 2

Et

(a) *I. Ep. II. 55.*

(b) *II. Serm. II.*

Et quis illis vadimonium pro fortuna præstitit? Interdum enim & ditissimis ordinaria lautitie sua, invitis divitiis suis carendum est. Quam infanz tandem conviviorni leges, quæ palatum ad pretia rerum componi volunt, quia ex alio orbe allata est, quia justam magnitudinem excedit, quia ante aut post tempus suum apponitur. Introducta in usum lætitiæ hospitalitas oneri fit. Ultra sitim bibitur; & jam vix oneri par stomachus, novis irritamentis excitandus est. Postridie etiam gratiæ agendæ, quod fere occiderint. Macete, Ofelle, qui ita tuos educaveras, ut recta in illa appetitu ferrentur, quæ sufficere, ac ideo appeti debere, vix longa alii ratiocinatione assequuntur.

§. XXV.

Nescio jam, utrum æquo animo laturo sint laudis & gloriæ studiosi, quod ultimo hic loco vota illorum expendantur. Fluit ex tenerrimo amore, quem natura omnibus ingenuit, ut quilibet aliis non indignus saltem videri velit, quocum communia humanitatis jura habeant: Si vero illum insuper multum ad incolumitatem, utilitatemque suam consilio, inventis, aut strenuis facinoribus conferre posse & velle credunt; si bonum vicinum, amicum fidelem, amabilem convivam experiuntur, nascitur inde amor quidam, & fiducia in illum, conciliandique ac retinendi desiderium. Hæc talis existimatio multum sæpe ad securitatem, ad obtinendas dignitates, & divitias facit, studiaque illa hominum ac benevolentia nobilem quandam in animo voluptatem pariunt.

§. XXVI.

In vita civili autem prærogativæ hominum externis indiciis distinguuntur. Honor, dignitas, auctoritas, ad certas familias plerumque, ordines, collegia, officia alligantur, & dignis indignisque promiscue patent. Acquiescendum itaque in moribus civitatis: Quibus ut jure suo fruitur, si cui savept, ita
contra

contra niti, & ambire, quæ non sunt in potestate nostra, inanis fere opera erit, aut quæ multum invidiæ, parum vero solidæ mercedis habeat. (a) Multa enim ex illis, quæ tanto ardore quærentur, in vulgi tantum oculis magna sunt. Quid tandem referebat apud Romanos degeneri Lævino, aurea in nigro calceo lunula, & purpuræ fimbria, quid exesæ majorum statutz, & suspensa in vestibulo devictarum ab iis gentium tropæa? Poterat amare obscuritatem suam Horatius, quando videbat nobilissimos potentissimosque homines singulis civibus adulari, patrimonía in sportulis, in ludis faciendis, in suffragiis conducendis consumere, & immensum æs alienum contrahere, ut lati in circo spatiantur & statuam impetrarent. Tum poterat gloriari, non queri se, ut alii solent, quod non sua culpa in exili fortuna natus sit, sed resumpturum etiam illam, si optio daretur. Tanti scilicet faciebat animum nemini obnoxium, quem nec sollicitudo augendæ pro dignitate rei, nec æmulum metus, nec salutationum incommoda, majorumve fastidia excruciant.

§. XXVII.

Potest aliquis etiam privatam vitam illustrare, & cum gloria latere, si modo dignam laudi materiem seligat. Non quam ille, qui nullam majus paupertate dedecus ratus, summam pecuniæ, quam relinquebat, sepulcro inscribi volebat. (b) Nec quam Gargilius, qui ut magnus venator crederetur, emptum aprum longo circuitu per forum campumque domum ferri curabat. (c) Et talia quidem ridemus, sed gravius insaniunt, qui famam quærent nequitia, aut semet ipsos perdendo, ut ille:

Conductis cœmens obsonia nummis

Sordidus, atque animi quod nolit parvus haberi. (d)

Supereſt ergo optima, & solida, & fere in potestate cujusvis
possi-

C 3

(a) I. S. VI.

(b) II. S. III. 84. seq.

(c) I. Ep. VI. 57. seq.

(d) I. S. II. 10.

posita innocuæ vitæ laus, (a) nec sceleris modo puræ, sed a suspicione etiam tutæ, (b) quæque tota officium faciendo transigatur, ac bene de aliis, pro modulo fortunæ, qualiscunque obtigerit, merendo. Cui si animus a superstitione & popularibus erroribus liber, & verum in unaquaque re discernere promptus accesserit, & bonorum probatorumque hominum suffragium, nihil iam ad gloriam deest. Neminem hic locus, ætas, fortuna aut vitæ genus excludit. Neque tamen & illa, aut populi iudicio æstimanda, aut cum affectatione requirenda est. Reposita sunt in conscientia adversus falsa opprobria, vanosque rumores remedia. (c) Molesti perinde ac ridiculi sunt, & qui probitatem suam ubique aliis obtrudunt (d) & qui summa imis miscere, quam fateri errorem, & emendationi locum dare malunt. (e)

§. XXVIII.

Omnia illa eo comparata sunt, ut appareat, nihil magis convenire naturæ humanæ, verisque utilitatibus nostris quam virtutem: quod efficacissimum est ad persuadendum argumentum. Neque forte male hæcenus Horatius. Cum enim nimium indulget genio, deferendus est. Nam licet sanctiorem sublimioremque disciplinam nobis tradat christiana religio, & gentilium quoque nonnulli, cum de Deo, de providentia, de anima hominis rationarentur, mente, qua longissime potest, proveci, similia fere illis, ad mores regendos inculcaverint; non contemnendum tamen est in hoc systemate, quod Horatius sui ævi hominibus ostendit, etiam si Deorum metum, fabulasque manes animo ejicere audeant, naturam tamen nos ad fortitudinem, iustitiam, fidem, amicitiam, temperantiam instituisse atque formare, & male actum fore cum mortalium genere, si ab illis recedatur: neque quenkum pro se melius sibi consulere posse, quam si ad illarum præscriptum vivat. Interest moralis doctrinæ, ut quam maxime fieri potest in aperto constituentur vitæ officia,

&

(a) *I. S. VI. 65. seq.*

(b) *ib. 34. 35.*

(c) *I. Ep. XVI. 38. seq.*

(d) *II. S. III. 39. 40.*

(e) *I. Ep. XVI. 24.*

et naturæ cum virtute concordia ad evidentiam deducatur. Quid enim illa natura? Nonne omnes illæ dispositiones, facultates, instinctus sapientem manum, mentemque superiorem ostendunt? Et sic natura divinæ voluntatis hominibus index atque interpret est.

C O N S P E C T U S.

- I. *Argumentum: præcipua doctrinæ moralis capita ex sententia Horatii explicare.*
- II. *Observatio naturæ fundamentum philosophiæ moralis.*
- III. *De primo philosophiæ moralis principio veterum dissensus, ejusque causæ.*
- IV. *Investigandum id in sensu communi.*
- V. *Secundum naturam varii boni & mali, & sic quoque officiorum gradus.*
- VI. *Officia justî unde oriantur?*
- VII. *Explicatur locus I. S. III. 113.*
- VIII. *Honestum quid?*
- IX. *Ei respondet virtus.*
- X. *An virtus propter se ipsam expetenda?*
- XI. *Naturæ ad virtutem invitamenta.*
- XII. *Virtutis opinio quantum in vita civili possit?*
- XIII. *Cur simulacra virtutum non sufficiant? Pulcrum virtutis.*
- XIV.

- XIV. *Incommoda simulatarum virtutum.*
- XV. *Affectuum incommoda.*
- XVI. *Decorum adversus Cynicos assertitur.*
- XVII. *Ridiculi character.*
- XVIII. *Asseruntur corporis & fortunæ bona.*
- XIX. *Quam rei familiaris curam commendet natura?*
- XX. *Ridiculum in avaritia.*
- XXI. *Voluptas quæ licita? Veterum de ea re dissensus.*
- XXII. *Fucundi & molesti sensus discrimen a natura.*
- XXIII. *Quæ seligendæ voluptates?*
- XXIV. *Ostenditur id speciminis loco in sobrietate.*
- XXV. *Existimationis curam commendat natura.*
- XXVI. *Quid ambitio incommodi & ridiculi habeat?*
- XXVII. *Quæ optima laus & quibus rebus querenda?*
- XXVIII. *Judicium de principiis moralibus Horatii.*

